

四庫全書

集部

欽定四庫全書

鶴山集卷六十二

宋 魏了翁 撰

跋

跋虞泰公祺所撰杜府君與權墓銘

府君余之妻之高伯祖也雅善虞泰公其葬也泰公為  
銘其墓且親為書府君為人不問可知後六十有六年  
余守潼川府君之曾孫闕仲携以相示因嘆前輩講學  
於利善之分文行之序率委曲致意凡以淑州里而攝

友朋務在可傳不為苟作今公之間孫剛簡率用是說  
蓋遠有端緒云

跋楊少卿子謨所題趙子安一經閣詩

謂籛金不若一經此鄒魯諺語也近聖人之世之居皆  
未遠也其詞氣已全不類鄒魯間語雖當時魯之大儒  
如夏侯長公輩亦不過以取青紫教授諸生蓋自漢武  
設科射策勸趨利祿後學所志大抵若此況於俚諺自無  
足責至於他邦以及後世又從可知而經生學士往往

摘此語以訓子孫惟今棘卿楊侯獨推明六經妙用以約之於身而後方信籛金非所樂此大與魯諺本指不同必嘗從事於斯者而後知是是理之亶然

跋張魏公帖

公自紹興十六年因天申節繳進無逸篇遂有連州之役至二十年移東二十五年秦檜卒而後公有出殿豫章之命則太夫人尋亦不待養矣此數帖正在連州時崎嶇險側有人所不堪而即其自處則從容自得藹然

有孝敬忠信之意蓋白駒考槃人也嗚呼所謂讀易者誦說訓詁云乎哉

跋江宗博致仕帖

古所謂七十而致仕者乃約而言之耳然而豈必七十仕止久速皆惟其時何謂時止其所而不忘慊於中而無餒則時也江君蓋審於是矣願與同志者共講焉

跋廣漢趙燮論語說

自秦漢以後為語孟者何翅千有餘家稽合同異參訂

舛訛亦云粗備極於二程先生以後聖賢之心蓋已暴  
白庶幾無復餘憾矣廣漢趙君燮一日以語說一篇示  
余為之喟然嘆曰聖人之道如彼衢尊之不禁有味之  
而知其旨樂焉而不厭者矣又有得其涓滴而知好之  
者有不知而唾棄弗顧者今趙君為之躊躇四顧蓋亦  
知其可好者充之而至於樂焉則更以勉之

跋杜忠可孝嚴曾祖節範處士告

封贈非古也而可以植世教厚民德慰孝子慈孫之心

則雖先王未之有也而固可義起然而自一世至三世猶可以例取無賢不肖一也乃若追錫號榮如冲靖史氏者義起之中又有義焉使非其祖孫之賢則下不敢以請上不輕以予今寶田公以縣佐而賜號至處士少常公以庶僚而追崇及曾祖則又加於史氏一等非其祖孫皆有以自致而能然乎倚其盛哉雖然禮所謂如執玉如奉盈洞洞屬屬然如弗勝如將失之夫其敬身而不敢易也則所以報其先者又將出於號榮之外少

常其知此矣

書潼川柳彥養墓碑陰

先天之學秦漢而後惟魏伯陽闢見此意至華山陳處  
士圖南始發其秘一再傳而為邵子建圖著書以示人  
曰先天學心法也故圖皆自中起萬化萬事皆生於心  
嗚呼衆人以易觀易而滯於易邵子以易觀心而得乎  
心滯於易則象數文字然耳得乎心則天地萬物與我  
一本也邵氏死而失其傳迨漢上朱氏及朱文公蔡元



定始申其說吾鄉觀物張公行成亦嘗推本邵氏說為通變經世諸書故今鄉父兄往往有能道之者余雖生晚亦幸得與聞乎此然師友之功未能浹洽蓄疑蘊惑罕所質問來守潼川乃得郡人柳振坤其父申錫先天天極諸書以示余自一歲一月一日一身皆有圖說至於九疇會極中央立極中星合極復分畫而附益之又作三易圖說十卷以探羲文孔氏之秘而上下經六十四卦卦為二圖以釋其義嗚呼是區區者奚所為而然

哉身既隱矣明既喪矣非以釣名干澤也自陰陽五行  
星厯氣候反覆參驗以求之心凡以自明耳矣余既不  
及與柳君接其說有余所弗及余所偶同又有余所欲  
言於君者皆不得而相與可否焉既以恨恨又嘆夫世  
之有志於學而不見之於人槁項黃馘以死者多矣然  
其書固不與俱亡也葬有日吾友度周卿為銘其墓振  
坤更欲求余語以識諸碑陰振坤之所以稱美愛錄者  
亦既無所不盡矣雖然洞洞乎屬屬乎如執玉如奉盈

如將失之振坤苟於是焉求之以不隊考志焉茲其為  
稱美愛錄也不既多乎尚懋敬之

跋游景仁侶所藏裴紹業告

自周之季封爵文書皆以印璽舍是則亡以為信而此  
告所用印乃以東都尚書兵部之印為文特進尚書右  
僕射下有在京二字當是在東都所給告耳然印文自  
尚之二字外率於篆法不合東不從木而平其上下都  
不從邑而巳上為口書不從日而其下為日如兵部印

三字則乃若傳摹失真者更無一筆可取唐士大夫於書法極工而此獨不合當闕之以俟知者

跋康節先生答富韓公柬

溫公歷年圖起共和之庚申迄顯德己未上下凡千有八百年以治平元年書成上送則邵子年五十有四富公年六十有一矣帖謂公亦以謂失之鄙夫亦以謂失之是富公先有所可否而康節答之也前輩講學不倦聞善相告聞過相規若此用能進則有以尊主庇民退

有以扶世立教也

跋賜潞京恤刑詔

猗其盛哉此天地生物之仁而堯舜三王之所以治天下國家我祖宗所以祈天永命之張本也熙寧始更舊制紹聖又以元祐所常行而改之小人挾其私意壞法亂紀而併與此廢之子云爾愛其羊我愛其禮後之知治體者寧無告于吾君而復行之者乎

跋康節與韓康公唱和詩

惟古於文必已出而先生此詩全用韓文公送李愿序  
意豈人心之所同固不嫌於相襲邪先生雖不為公卿  
得時行道而發明先後天之奧約之於事必踐於形所  
以淑時賢而啓來哲為斯世治理之助其為公卿不既  
多乎

跋秦伯鎮兵部問易康節書

衆人以易觀易而滯於易先生以易觀心而得乎心其  
方圓圖皇極經世諸書消息陰陽之幾貫融內外之分

蓋洙泗而後絕學也其見於擊壤諸詩造次顛沛無非此理之發焉者是何嘗有隱於人特秦伯鎮鄭揚庭章子厚諸公不足以知之耳先生嘗語鄭曰山川風俗人情物理有益吾學者必取諸焉秦曰道滿天下何物不有豈容人關鍵耶先生字字言言莫非推赤心以置人腹中亦幸夫人之得其傳彼沈存中謂竟不知何術既不足以語此邵子文元其父於太高而待人太薄亦知汙者也

跋康節詩

理明義精則肆筆脫口之餘文從字順不煩繩削而合  
彼月煅季煉於詞章而不知進焉者特秋虫之吟朝菌  
之媚爾

跋呂文靖公試卷真蹟

文靖公三相仁宗以才識稱其卓卓可記者如納天書  
於方中與夫止玉清營繕正章懿喪禮却契丹借兵罷  
宦寺監軍杜母后專政之漸謹人主御樓之拜發郡國



建學宗正睦親之議此非無素者所能辦雖與范歐異  
論晚年乃能同心戮力以扶王室是宜子孫之傳自惠  
穆正獻而後滎陽右丞中書駕部代有顯人至成公而  
以學問名世與宋靡已倚其盛哉此我太祖太宗之德  
也科舉特為之梯航耳

跋青神杜才叔和歸去來詞

三馬食曹叔夜有宜去之書一龍禪宋淵明興歸來之  
歎然而淵明雖勇退而能雖容不迫若將微罪行者視

叔夜之闕直而輕愠殆有間矣史載淵明之去在義熙  
三年以其時考之蓋宋高祖殺劉仲文之歲昭明所謂  
恥復屈身異代者為得其心夫豈以一督郵而為此悵  
悵哉而古今罕有能發之者杜君此文作於蜀盜未平  
之日其尚淵明之心乎某昔守君之鄉顧不及識君嘉  
定十五年九月邂逅其子安石於臨安始見是作因推  
本昔人所未發者識諸篇末而歸其書杜氏

跋端明程公振謚剛愍議

自吾有寇難如劉仲偃傅公晦張德祥霍安國李清卿  
唐聖任及梅陳程安四從臣皆死節之著者其次蔣興  
祖死於陽武張子固死於隆德朱彥明數人死於震威  
郭許朱友恭死於涇原又其次則忍死於外而卒能自  
明者不可勝數嗚呼王呂始禍章蔡諸人成之皆以七  
秩八秩之年生都將相沒保首領若死者則不必皆所  
用者也詩曰如彼衆流淪胥以敗亦足以發千古之一  
嘆

跋張忠獻公所與張忠簡閣三帖

張忠獻公再相首薦張忠簡及虞忠肅陳正獻王文忠  
汪端明皆可備執政劉忠肅胡忠簡諸公可備風憲然  
大抵皆紹興末年所與同志叶謀者也自戊午議和胡  
忠簡以言語得罪十有八年之間竄逐者相望而能於  
此時誦言義不可和者如張忠獻之三十餘疏如張忠  
簡累千百言則尤難其人然則二公盖又同為人所難  
能也功之成不成天實為之而著明大義炳若日星使

為人子為人臣者莫不曉然知其分之所當止茲其有功又惡可以淺近計哉此帖蓋隆興癸未督府所書時六十有七距卒之日纔一年耳嗚呼是所謂鞠躬盡力死而後已者真可敬仰也

跋三傅祠記行狀

余始識正夫於都城問奚自曰茲湖楊氏也間袖一編書過余蓋南城之人祠其先君子若伯仲父茲湖為之記潔齋袁氏書之其諸父行實繫其後俾余識之余謂

南城之人奉嘗夫三子者於傅氏子弟何與期有以告之而未能也他日又以茲湖問答相視其間有遺其伯氏道夫書云天乎吾道之亨乎自兩楹夢奠雖漢之黃叔度唐楊文簡公未知淺深本朝濂溪明道康節所覺未全伊川未覺道夫昆仲皆覺余憮然自失千載一門可謂盛矣茲其為顯揚不既多乎而求諸人以為信無乃有外之心與正夫其終覺焉

跋吳正憲公充帖

正憲以其從子留獄得罪諭之使歸夫獄之不修雖執政之從子有不得免焉祖宗所以祈天永命此其推也後二帖則余亡友宋正仲之說已得之猶恨有闕遺者如謂壻為郎謂叔父為叔叔母為媼等語皆漢魏以後流俗稱道求其義而不得者雖士大夫亦不免襲訛踵陋當併出之以識世變云

跋吳正肅公育帖

諸賢所題無復遺恨獨念靖康之禍故家文獻半為煨

塵吳氏世居浦城中又諸子皆位通顯而手澤亦無有  
存者今其曾孫所藏四帖皆自外得之亦可嘆矣夫

又帖

此帖所稱希深以詩中有謝家郎之句故皆指為謝希  
深且希深以正字卒於寶元今為故希深舍人而正肅  
為西臺在嘉祐間其事偶亦相符然後帖乃彷彿有王  
大字不知誰塗之而墨痕如新或曰安知非稱三丈邪  
然希深乃賓客之長子不在第三未知果為誰也當考



跋盧氏正歲會拜錄

古者比閭族黨之法修則有相保相受相葬相救相賙相賓若吉凶賓射之器服民不能自為也則主集者以里布屋粟之物為之以給其用而又屬之讀法屬之飲酒以維持護養之其詳密若此蓋盈宇宙間無尺地一民之不相聯絡者所以共明命而厚同體也而況於吾宗族乎裳裳者華其葉湑兮氣相屬潤相滋也常棣之華鄂不韡韡體相親意相承也士大夫而知此則上治

祖禰下治子孫旁治昆弟由根心以枝葉必不忍薄其所厚疏其所親者自王制壞敬宗收族之義不明歷漢魏以後雖間有重氏族爭門戶立廟院修宗會等事斑斑見於史冊而利欲重歟親疏厚薄之等有不得其本心者多矣先儒所以欲收世族欲復小宗欲立譜法蓋深有感於世道之變者而卒亦不能行因同年友盧申之以其族正歲會拜錄相示歆慕咨嘆使人孝敬之心油油翼翼然不能已敬以所聞書於下方且以自勉云

跋鄭資政剛中遺事

余嘗過利州登鄭公思耕亭未嘗不撫事嘆息也守襄陽者多矣歐公記峴山亭獨稱羊叔子守廣漢者豈無他人而劉夢得李文饒諸人獨稱房次律凡名實殽於毀譽向背變於死生皆不足以定是非至於歲月浩瀚情偽寂寥而著乎斯人之心獨隱然與所寓俱存斯其為人不問可知然則士之所以為可傳者將在此不在彼夫

跋李清臣奏疏

李定黃履諸人固不足多道常夷甫晚節亦鄙賤可笑  
其欲追帝孔子何但知聖人汙也淇水翁雖與元祐諸  
公異論而此疏非喜為異者迄今百五十有一年歷觀  
人物品第判若黑白吾黨亦可以自傲矣

跋沈國祿煥淳熙八年太學私試策問

古之士二為貧為道而已為貧焉則苟以祿仕然非飢  
餓不能出門戶不為也亦有飢餓而不肯為者矣夫苟

為道則立乎人之本朝大將行其道次猶欲行其言否  
則去之雖窮乏者得我且不為也況妻妾宮室乎此義  
久矣不明沈公乃能招諸生而誨之人主不以為忤宰  
相趙文定亟稱之此人心之所同也不知位司成職言  
責者獨何人而斷斷魚斤切齒根肉不可否之三曰包羞其象  
曰位不當也三以陰柔居上自知不當其位亦報亦作被  
然不能自安然則彼斷斷者夫非盡人之子與後四十  
有四年臨邛魏了翁撫卷太息書而歸其子省曾

跋晏元獻公帖

晏大正自跋以文定致仕為康定二年康定無二年也以公檢

傳樞使為慶

歷初亦差

案公康定元年三月自三司使除刑書知密院厥九月以檢校太傅刑書充使慶歷二年七月加檢尉平章三年三月以行刑書為集賢相而李文定公由彰信之節除宮傅致仕則慶歷二年七月也然則前二帖其康定之元與慶歷之二年乎後帖半幅所謂五十年作官苦學猶自步步事事共人商量此語尤可玩昔人謂至微勛

業有難立儘大功名或易為元獻公流聞光顯吾嘗以其行於家人父子間者觀之

跋朱文公所與輔漢卿帖

亡友漢卿端方而沈碩文公深所許與往來書帖當不止此然其懷人憂世勸學興善之心於此亦可畧見矣所謂當此時節立得脚定者亦難其人況更向上事邪文公之所望於學者蓋若此吾黨盍知所儆發云

跋李肩吾

從周所書損益二卦

李伯謙每誦懲忿窒慾遷善改過之訓以自儆李肩吾  
為書損益二卦以贈其歸又以修裕名所居堂而屬余  
書之嗚呼觀山高澤下之象以懲忿窒慾不其修乎觀  
風行雷迅之象以遷善改過不其裕乎修所以自克也  
裕則復於禮矣二者易之要義伯謙勉之

跋顏魯公爭帖

魚朝恩擠郭令公折元載搖相里造侵王縉一時權燄  
熏灼若此魯公秉義以奪其驕至今幾五百年尚凜凜



有生意猗其偉與但其間稱譽朝恩數十言大半於行間增入豈猶未免於危行言孫邪

米南宮云絳有顏氏字一圖書且顏字以彥彥从文从厂下三畫則當在文字之旁而移於厂下者也今印文从卒从灸書字下从者今從曰跋胡復半塾詩藁

古之為文皆以德盛仁熟流於既溢之餘故雖肆筆脫口而動中音節非特歌詩為然也禮辭易象亦莫不然

自離騷作而文辭之士與世之以聲律為文者傳會牽合始與事不相儷文人才士習焉而不之察也縉雲胡復亨道攜詩編過余請序其篇端余以未有雅素辭焉亨道求之不已余觀昔人盖有序他人文集者矣如蕭穎士之於李翰權德輿之於陸贄劉禹錫之於柳宗元李漢之於韓愈皆以其行成言立故為紀述其事以傳世示後耳今亨道年三十餘如沃桑天楚未已方將而遽以一編自畫乎姑試一言以謝勤辱他日再見當申

此義以規進學之候嗚呼亨道其亦以余言為然乎

跋朱文公所與任伯起樞密東

前帖論處已接物之要曰循理而行自然中節後帖論  
讀書作文之要曰平心熟看自見滋味嗚呼旨哉斯言  
聖賢所謂勿正勿忘勿助長所謂欲其自得之自得之  
則居安資深者皆是義也賢者宜有以精體而篤踐焉  
跋陳了齋辯王荊公目錄

古人之學自格物致知誠意正心修身齊家治國平天

下初無二本自本諸身至徵諸庶民考諸三王建諸天地質諸鬼神俟諸後聖亦是一理今日不通政事却深於經術又曰其人節行過人甚多審如其說是能格物致知能正心誠意而不能以行之天下國家本諸身矣而於庶民且不合三王後聖天地鬼神從可知也此理曉然易知而能惑世誣民於十九年間以養成亂本又能使紹聖以後守其說而莫之改嗚呼天不欲使斯世平治邪何了齋諸人聯章累疏而莫一省也後了齋之

死一百三年臨卽魏某撫卷太息而書其後

跋趙清敏公墨蹟

此軸大槩惟公廉二字皆士大夫所當為者自義理不競貨物成習清敏高風邈不可及嗚呼亦足以悲夫

跋蘇文定公帖

蘇氏兄弟平生大節在於臨死生利害而不可奪其厚於報知己勇於疾非類則歷熙豐祐聖之變如一日而後知世之以文詞知二蘇者末也此祭文書疏凡八紙

距今一百三十有四年一時風誼尤可想慕撫卷太息  
書而歸之番陽張氏

跋米友仁帖

米南宮大字雅逸細書結密皆有可法至好為小篆則  
有不知而作者元暉雖不逮其父然如王謝家子弟竟  
自有一種風格也

跋斜川帖

斜川侍坡翁至僂耳父子相對如霜松雪竹堅勁不搖

而作詩結字乃爾潤麗其襟順裏方者乎

跋蘇養直後湖一詩

後湖辭召之語殆與昔人絕交書同意其作為歌詩殆若不以世務嬰懷此豈以潔身為高者士之進退去就亦惟度德比義行吾心之所安臨邛魏某凡五乞祠未獲命方襍被待去會張學古二子世美世南將歸番陽出是二紙慨然興感書而授之

題林叔清古易

易之為書廣大悉備知仁隨見小大由識各適所求至  
近世周程邵張子以後諸儒輩出易道幾無餘蘊矣三  
山林君又為周易古經解依上下部叙以六十四卦三  
百八十六爻臚分彪析而證以古今善惡是非之事此  
非積歲累月不能為或曰審爾則易之書四百五十事  
而已乎曰不然也林君之為是也亦不過約為之說以  
自識其知仁之見云爾非斷斷然以是為不可易也程  
正公易傳晚而後出猶以迫於門人再三之請且自謂



僅得七分然則林君尚勉之哉

跋陳尚書

宗呂

均贍宗族真蹟

范文正公嘗謂其子弟曰吳中宗族固有親疎吾祖先視之則均是子孫吾安得不恤其飢寒哉又曰祖先積德百餘年而始發於吾得至大官若獨饗富貴而不恤宗族何顏以入家廟每味此語使人孝敬忠愛之心油然而翼翼不能自己今獲觀內翰尚書陳公此紙于公之子貴誼蓋范公之心異世一轍足以厚倫而勵俗不勝

興敬謹書於下方詩曰裳裳者華其葉湑兮來者尚勉之哉

跋環溪吳先生沆夢記

古者文史星歷卜筮之職領於春官皆以大夫士為之三巫之屬凡以神仕者亦皆精爽不貳齊肅中正之民故夢之於侵也豐荒之於雲也軍聲民氣之於風也皆若不相關而古人精體熟察視為至近至切之事周自文武之世距宣王凡三百年甫申之生亦何關乎文武

而記夫子者自天地之神至氣志之神嵩嶽之神文武之德只通作一體士大夫而能識此理然後可與語環溪夢記

跋范太史記司馬公布衾銘

范正獻公以書局從溫文正於洛凡十有五年於公之起居動息必審視而詳記雖布衾角枕亦以驗公所安於儒生窮達之際殆與孔門弟子書鄉黨同意孔子曰吾無行而不與二三子者今愚於馬范師友亦云

跋聶侍郎子述所藏徐明叔篆赤壁賦

才知之士滿天下而書學不得其傳許叔重稽諸通人作說文解字猶未能無闕誤李少溫中興篆籀而所刊定尚多臆說信書學之難能也徐昂臣楚金兄弟最有能稱一時如鄭仲賢郭恕先皆號善書皆自許氏非謂許氏果能盡字書之蘊蓋舍是則放而無據耳舊聞徐明叔善篆今觀其遺墨則說文解字之外自為一家雖其名及字見於印文者亦與篆法不同又有保大騎省

之文保大為南唐年號騎省乃雖熙職秩亦所未喻姑識所疑以俟識者

跋陳中舍貴誼所藏杜正獻草書

杜正獻公嘗為詩曰老來楷法不如初試向閒齋習草書落筆何曾見飛動彫章早已過吹噓公楷書端勁如其人逮暮年始學草書而歐蔡蘇黃皆盛許之豈非大本先立則縱橫造次無往不合邪

鶴山集卷六十二

欽定四庫全書

集部

鶴山集卷六十五

三五

詳校官庶吉士

臣張溥

主事

臣

呂雲棟覆勘

總校官檢討

臣何思鈞

校對官主事

臣陳文樞

謄錄監生

臣周元信

欽定四庫全書

鶴山集卷六十三

宋 魏了翁 撰

跋

跋陳正獻公所藏孝廟御書用人論

正獻公以乾道五年秋八月升昭文相其冬對選德殿  
詔撰用人說今載在集中與所被宸翰文雖異而指則  
同倚與盛哉君以是戒其臣臣以是復其君開誠布公  
兼衆盡下孜孜若弗及焉凡以較時幾而釐帝命云耳

詩曰鳶飛戾天魚躍于淵豈弟君子遐不作人倚其盛  
哉後五十又八年靖州逐臣魏某獲拜觀于公之子宿  
追惟一時明良之會不勝感嘆謹拜手稽首書於下方

跋陳忠肅公岳山壽寧觀留題

詩云閣前千尺碧琅玕喬岳蒼松苦歲寒此  
是萬年峯上竹何須更待雪中看

了齋陳公以元豐己未擢進士三名後數年為博士校  
書郎以鯁直不得久居中徽廟初政召為諫官忤蔡京



謫揚州管庫欽聖持其事改知無為軍明年又自著庭  
宰掾攝官瑣闥坐忤曾布出守海陵崇寧元年蔡京相  
除名勒停編隸袁州尋移廉移郴五年春正月以堦出  
仆碑而京罷相凡黨人皆得歸故今岳山壽寧留題所  
謂丙戌四月蓋公東歸道所從出也後元豐一百二十  
年當慶元己未臨邛魏某始以進士起家又二十有八  
年當寶慶丙戌某得罪南遷四月七日度湘即公留題  
之日會壽寧道士唐從善以是日掘地得公石刻介郡

人張南仲杞求一語記歲月嗚呼人嘗涉於憂患則見  
似而目動聞名而心惕故於公之忠孝大節所願學也  
若夫出處歲月之適相似則吾甚懼焉

跋楊文公書遺教經

某自結髮遊聖人之門窮益深測益遠今髮星星矣大  
懼年數之不足其於他道蓋未暇及也今伏觀內翰文  
公手書遺教經嘆先賢餘力所及猶若此謹拜手書於  
下方

跋楊文公真蹟

公博極群書自經史百氏以及於倚馬急就之文稗官  
虞初之說旁行敷落之義靡不該貫今于公之裔孫紹  
雲見公手抄唐人詩及遺教經益知公所以用力於文  
者蓋若此嗚呼此公之所以為文與曰不然也同時以  
文鳴者如王定國丁謂之孫漢公曾正臣梅昌言錢希  
白諸人非不爭相長雄而天下之士獨宗楊劉至於以  
文易名則公擅其美文乎文乎其纂組綴緝之云乎正

色直道不苟於合能使人主憚其性氣雖在上前亦曰  
如此富貴非臣所願他日昭陵語王文康曰楊某為國  
竭忠有君子之大節然則是可以為文矣是以謂之文  
也劉中山與公齊名其出處大致亦近之

跋方宣諭宗卿庭實奏議

國家自熙豐大臣養成禍本崇寧改絃未竟而紹聖以  
後再踵前誤以濟私欲卒之俗頽世敗潰裂四出而猶  
謂和親可以暫安辟徙可以亡患至建炎中興亦云極

矣而於是失河南北失京東西維揚而渡江會稽而桴  
海猶不敢與彼抗其間徒賴宗忠簡李忠定張忠獻諸  
賢後先維持僅僅自立而權檜再用則挾寇以扼君父  
矣微公與王胡曾李諸賢大聲疾呼以立正論之幟幾  
無以為國三京淮北之役繕修陵廟還定遺民表善蒐  
賢招攜振乏則又不徒以言語立國凡皆正人心植邦  
本之實政雖不幸而不卒其志然其以疎遠當權燄以  
孤忠破羣慝則有人所甚難者焉不寧維是蔡氏之盛

附之者立致華顯公莆人也於蔡又夙有連自公舉政和進士正孽京之時也而公之立朝乃在紹興以後然則以其所主以其所不為公之所志所學蓋自其始進而固然矣豈無膏沐誰適為容亦足以發千古之一嘆云

題復州鴻軒

故起居舍人張公文潛以元符二年秋坐元祐黨人謫復州監酒明年春徽宗踐阼起通判黃州以秋至而春

去託諸鴻以名軒軒之壞已久而邦人思之不釋嗚呼  
其孰為思之耶廣安楊伯洪恢來攝州事自皮陸諸賢  
以來顏宮廢址咸為興復是軒亦居一焉而屬余題榜  
且識歲月顧臯戾之人何所容喙每愛其集中有坐局  
沽酒與務中晚作諸詩豈惟素位而行無一毫不自得  
且方屹屹於所當事者焉詩曰敬天之怒無敢逸豫此  
未易與俗人言也伯洪以為如何

跋張魏公帖

公平生凡五謫而居永者三紹興七年自祠官謫永一也二十年自連移永二也二十六年以母還蜀猶不為時論所容自蜀還永三也此帖所謂零陵之行以詞翰及事實攷之蓋七年九月以後也方被讒放逐之餘而感恩思過無纖毫忿懣困躓之意且為從母賻喪誌葬期有以慰其母心昔人謂仁義人其言藹如也非公之謂與後九十二年蜀國同郡人費誼屬魏某識其後於是書於靖州客舍



跋陳忠肅公帖

余早有慕蘭之志雖於公無能為役而始初入官亦有  
適相似者故於公平生言行頗得其詳而公所為易解  
日錄辯及簡牘數十取素尊堯集家書千數百言凡皆  
得其真蹟而藏之是帖蓋晚歲自九江移南康南康移  
山陽時也宣和三年八月方寇既平蔡氏方以飛語謂  
公之壻嘗為寇所抄取公竟坐遷陽山君子亨否碩蹇  
無毫髮加損也祇以成宣靖之亂耳宣和之六年而公

卒又明年而劉諫議卒元祐氣數既盡北寇內侵然則亂匪降自天乎抑人實為之也

跋北山驚議

予自嘉泰三年冬造朝道淮西始識鄧伯允友龍慨然以興復自任明年鄧召還予意開邊之議已決會明年春正月召試玉堂乃極陳權姦猾胥債帥驕卒必取禍辱宜急於內修緩於外攘凡數千言侂冑見之大怒徐杓承望風指擊之侂曰得無成其去就之名乎乃止是

時張伯子徐文子與地官侍郎王公皆先後以不合去  
大抵皆徐疏也丁侍郎常任亦能以條具異論去極於  
錢伯同之謫上饒自是莫敢有言者矣錢張徐丁之議  
則固知之若北山懃議則昉見乎此嗚呼何其直而暢  
辯而不訐也詩曰匪用為教覆用為虐亦足以發千古  
之一嘆云

跋司馬子紀先後天諸圖

涑水司馬叔原覃思義理之學自義文周孔之易河圖

洛書之數陰陽動靜之義日月遲速之度以及周程張邵朱張子之書旁觀歷覽為圖為書時賢皆有題識又欲求一言於予予遷靖未返不得與叔原共學姑識數者之疑於末且先天圖自魏伯陽參同陳圖南爻象卦數始略見此意至邵堯夫而後大明千數百年間不知此圖安所託而圖南始得此圖亦已奇矣而諸儒無稱焉數往者順謂震離兌乾知來者逆謂巽坎艮坤皆以左旋言之今叔原以為自乾至震自坤至巽此必有所

據朱文公以十為河圖九為洛書引邵子說辨析甚精  
叔原從之而邵子不過曰圓者河圖之數方者洛書之  
文且戴九履一之圖其象圓五行生成之圖其象方是  
九圓而十方也安知邵子不以九為圖十為書乎故朱  
子雖力攻劉氏而猶曰易範之數誠相表裏為可疑耳  
又曰安知圖之不為書書之不為圖則朱子尚有疑於  
此也近世朱子發張文饒精通邵學而皆以九為圖十  
為書朱以列子為證張以邵子為主予嘗以乾鑿度及

張平子傳所載太極五行九宮法考之即所謂戴九履一者則是圖相傳已久安知非河圖也靖士蔣得之云當以先天圖為河圖生成數為洛書亦是一說叔原謂日月亦左旋此張說朱意也第日起北陸春西陸夏南陸秋東陸而冬返乎北陸則為右乎左乎謂日速月遲讀書窮理正欲其自得況叔原所引見處一分虧之詩即予少作也吾儕所見本不相遠第以歷家細算分數言之則月行十三度餘者特約法耳其實則一日至四

二十四至晦行十四度餘五日至八二十至二十二行  
十三度餘惟自九日至十九僅行十二度餘此猶二至  
之晷刻最遲不為無理而叔原反疑之獨取望日為證  
則望日正行遲之日也況本乎陽者常舒遲本乎陰者  
常急促若日遲而月速大者舒而小者促此亦陰陽  
自然之分也叔原之圖精且密矣蓋更以是審思之日  
食書甲乙如辛卯日與辰相尅為異尤不經康成雖  
有是說然春秋壬午日食亦日與辰相尅也而左氏謂

不為災又何邪叔原謂分星起於漢唐謂漢則已後謂唐則滋邈豈以左氏內外傳與周禮為不可信邪是三書亦有可疑而分次之說相傳已久獨星不依方而以受封之日為次此傳注之可疑而未有說以破之耳大抵叔原之說十得六七予方斂衽之不暇尚有未能釋然者姑摘一二以備審訂他時道燹以如邛叔原必有以復於予也紹定四年六月甲子臨邛魏某書



跋彭忠肅公真蹟後

止堂集之成書也公之子鉉既屬叙篇首今又從公之  
諸孫堦蕭仲友應祥獲觀公手蹟二詩大抵與朋友唱  
酬可以吟詠情性揚摧理道惟貴人生日詩難乎為言  
蓋人主生日為樂始於唐士大夫生日之盛則始於近  
世故前輩詩集唯少陵示宗武生日與東坡為同氣之  
親或知己偶有所賦而他集罕有若用之公卿貴人則  
無之直自京檜以來此風日甚始則稱功頌德甚至將

以金玉帛幣嗚呼唐太宗之感蓼莪獨何人邪止堂所  
上張端明詩雖未能免俗然其間如云江湖秋已多字  
宙清無邊氣凝萬類實人亦體其全端明英邁人也止  
堂不以頌而以規然則非志於古道者其能然乎仲友  
其實此庶來者有以觀世變焉

跋尤氏遂初堂藏書目錄序後

余生晚不及拜遂初先生聞儲書之盛又恨不能如劉  
道原所以假館於春明者寶慶初元冬得罪南遷過錫

山訪前廣德使君則書厄於火者累月矣為之徬徨不忍去因惟國朝以來藏書之盛鮮有久而弗厄者孫長孺自唐僖宗為榜書樓二字國朝之藏書者莫先焉三百年間再燬於火江元叔今江南吳越之藏几數萬卷為臧僕竊去市人裂之以藉物其入於安陸張氏者傳之未幾一篋之富僅供一炊王文康李文正廬山劉壯輿南陽升氏皆以藏書名凡未久而失之宋宣獻兼有畢文簡楊文莊二家之書不減中祕而元符中蕩為煙

埃晁文元累世所藏自中原無事時已有火厄至政和  
甲午之灾尺素不存斯理也殆不可曉聖賢不過託之  
憲言以垂世示後所以共天命而植民彝也兼收並蓄  
博覽精索以淑其身以待後之人此何辜於天而厄之  
爾極也使子孫不能守如江張王李諸家是固可恨若  
孫宋晁氏則子孫知守之矣而火攻其外矧如尤氏子  
孫克世厥家滋莫可曉雖然是穠是裝雖有饑饉亦有  
豐年吾知有穠裝耳豐凶非我知也尤氏子孫其尚思

所以勿替先志云

題李肩吾為許成大書鄉黨內則

吾友李肩吾彊志精識嘗為字通一編以正法繩俗許  
成大見而悅之亟從問李肩吾授以鄉黨內則二篇夫  
內則先王所以降德於民而鄉黨吾聖人無行而不與  
二三子者也民有是物必有是則顧習其讀而弗之察  
嗚呼其能朝夕於斯則不惟知言語容貌居處飲食皆  
立誠定命之要亦以見書名之學偏旁點畫具有顛末

乃知類入德之本而世亦罕能知之也詩曰朋友攸攝攝以威儀成大其懋敬之哉寶慶三年三月甲子臨邛魏某書於靖州鶴山書院

題李肩吾所書鄉黨

吾友李肩吾博見彊志書名之學世亦鮮及之渠陽山中為余從子令憲書鄉黨篇余獲與觀焉嗚呼天道至教風雨霜露接人耳目而人由之不知也聖人至德威儀容貌洋洋乎簡冊而人習焉不察也嗚呼小子憲肩

吾所以遺爾者多矣往敬哉其體習踐修惟無數

跋鄧氏四世死事

嗚呼自童蔡以及秦韓養癰護疾以底於潰敗者誰與而封疆之吏首當其禍君子小人之幸不幸每每若此撫鄧氏遺事為之三嘆

跋處士蔣南武家傳

嘉定之季年重珍不以某不肖屬書母夫人顧氏之寃因得習觀處士言行明年改元某得罪南遷過錫山重

珍又出示家傳斂容伏讀歎味不忘詩曰維其有章矣  
是以有慶矣然則處士之有子也宜哉

跋顧夫人墓誌後

明年十二月癸卯某過錫山觀典型於堂昨參聞見於  
國人益信前銘之不誣尚恨筆力淺弱不足以盡發潛  
懿也

跋家季文守富順日拒吳曦偽檄事

予平生為人記述多矣觀書太史氏閭人益廣姑據予



所身歷者言之孽韓柄國逆吳事仇士大夫不曰拒則  
曰去使誠有之亦為臣之常分況不必皆然方事變之  
殷雖能言者已鮮及事已變息則敢為者常多此可盡  
據邪家侯李文富順文檄與趙薛二守報書則信而有  
證嗚呼是非之心其孰無之而奪於利害以謬迷其所  
固有甘於禍家凶國而不知顧者多矣此非素講預定  
安能斷斷若此予嘗為侯記積善堂今江淞閩相間家  
有是記大畧謂吾惟循理盡分而為之他人何與焉幾

若爲此事發者故又識於此以申侯善善惡惡之初志云

跋邵康節檢束二大字

趙丞相子直孫必愿所藏二字下注云檢謂檢

其行止束謂束其情性

先生嘗爲詩曰憶昔初書大字時學人飲酒與吟詩若非益友惟金石四十五年成一非然則茲二大字與束其情性之語未必晚年安且成之時也後學魏某謹書

跋樓參政紹熙五年內禪詔草

某未冠時侍長老聰紹熙末年内禪詔書至所謂雖喪紀自行於宮中而禮文難示於天下為之色然以嘆知朝廷有人也後此三十二年乃獲觀藁墨於宣獻樓公之季子又見當時刪易鈎注雖倉卒之頃動中理道孟子曰天子不能以天下與人然則言動幾微之間莫非天命之流行豈一毫人力所能予奪其間乎史官魏某謹書

跋毛氏增韻

三衢毛氏增韻奏御之六十二年其子居正義夫應大  
司成校正經籍之聘始克鋟梓於胄庠然人情異嚮趨  
簡厭煩故校其始著尚多刊削世之不過者非特一增  
韻也

跋番陽董氏所藏東坡墨蹟

蘇文忠雅耆陶公文其有感於歸去來詞蓋元豐五年  
之夏蔡章被遇而呂正獻不合之時也長公在黃少公  
在筠此何時也而猶可以仕乎否之訟曰大人否亨其

遜曰色羞然則以亨易羞果孰為得失乎遺墨藏於義夫之族子煇臨邛魏某與之為寮因得寓目因識其後

跋黃太史帖

董季興壻於沙隨程氏多識前言往行余與為寮皆得與聞之獨太史此帖未睹今其子甄自竟陵以石本見寄則時賢題識已悉尚何云姑識歲月紹熙二年七月  
鶴山魏某

跋張忠獻呂忠穆與李忠肅書

明受之變不有居者誰守社稷不有援也守將奚爲復  
辟之後張呂李鄭諸賢以次受上賞蓋人臣所當爲人  
主所當報各適其分焉耳而或者猶不免著書以詆平  
江之功惟文肅於呂張二公情誼始終無少猜間嗚呼  
其深明於事君交友之分者乎不寧惟是張忠獻以李  
忠定殺諫臣攻之至再隆祐汎舟之役公與呂忠穆亦  
異論迨其間退之後死喪之際考於是帖則懷人憂世  
固未嘗有纖介之嫌信乎周比和同之別特毛髮耳而

公私誼利縣隔霄壤嗚呼其嚴乎前史臣魏某謹書

跋趙昌父送劉清之子澄事後

靜春劉公之去衡也章泉趙公亦去之或曰非悻悻與  
曰禮有之凡食賓君迎賓大門賓入君再拜賓辟君揖  
入賓從三揖三遜久而後成禮賓出君送之大門則擯  
者已返告曰賓不顧矣夫始焉迎之拜之揖之而後升  
其後君送而已不顧非始煩而終簡也然則士大夫進  
退之節於此亦可槩見云

跋類省試策卷後

予以貧賤未免有科舉之累然亦恥為揣摩剽襲之文  
始舉於鄉故吏部郎趙公大全取之於類省試吏部與  
故知邕州李公取之故簽書密院宇文公又主之嗚呼  
乖逢得失其孰為之耶嘉祐間尚西崑體而歐文忠公  
典舉首取古文紹聖以後尚王氏說而陳忠肅公主別  
試多取史學主司之不徇時好固難其人而舉人亦有  
以是應之者然則乖逢得失豈必皆工於舉業者李先



生之子義山以予大慚之文相視因識其末

跋羅文恭公點諫藁

文恭公奉疏既嘗為之序引後二年蒙恩歸自靖道荆  
州公之子愚出視元藁其間所謂諫者歸過求名人才  
至身後議論乃公職吏之弗戢繇大吏越足三尺外人  
才不更事者必不可用此皆千數百年相承而莫知其  
非者我視謀猶伊于胡底亦足以悲夫

跋羅文恭公薦士藁

予嘗以呂正獻公掌記司馬文正薦士編陳密學章橐  
范正獻手記李邦直舉官記及近世虞忠肅公趙材館  
錄輯成一書刻之潼川漕司惟呂文穆公夾袋小冊韓  
忠獻甲乙丙丁集曾宣靖雌黃公議未得全本今幸從  
文恭公之子愚獲觀薦士橐前輩懷人憂世之規大抵  
皆如此凡以謹時幾而登帝命也俗流世隘此事久無  
聞矣三復遺墨為之永嘆

跋羅文恭公後省繳駁橐

祖宗虛已盡下一政令之出自始進擬已有中書三省  
密院分班同班之別人得以自靖自獻不嫌於異同迨  
其既行則給事中舍人或書或否各行其志不關白長  
官或諫官有言臺臣不及知臺臣有謂不可諫官或是  
之蓋臺諫官平居未嘗私相往來也臺諫偶已同是侍  
從以次至於臣民或特以為不可此事甚衆不暇枚舉  
自京檜用事惡異喜同士大夫始以是為驚怪乾淳涵  
育之久積而至於紹熙然後此意僅僅有存今觀文恭

公後省諫橐明逐臣之冤斥臺臣之誣乃其一事也謹書橐末以識世道升降云

跋公安張氏所藏東坡帖

世之知蘇子者必曰言語文章妙天下其不知之則曰譏訕嫚侮不足於誠乃若蘇子始終進德之序人或未盡知也方嘉祐治平間年盛氣強熙寧以後嬰禍觸患靡所回撓元祐再出益趨平實片言隻詞風動四方迨紹聖後則消釋貫融沈毅誠慤又非中身以前比矣士

不精考而以一事槩一人一言蔽一生者姑以是思之  
是數帖即紹聖後事今藏之永平令張仲車篋中紹定  
四年春臨邛魏某與寓目焉因識其末

永嘉薛榮祖臨予觀亭記本而書袁和叔之語曰  
觀外不如觀內觀民不如自觀以求予一言

薛君引袁潔齋語識諸觀亭記之末觀之義滋有所發  
大抵古人觀象觀法觀物觀我無一物而不知察所以  
會衆理而致吾知也觀之為卦實明是義今傳注之說

則象象為觀示之觀六爻為觀瞻之觀竊意韻有四聲反切以前安知不皆為平聲乎於是聞見視聽高深先後遠近上下之等皆有二字且考諸義則二字固可一而參諸易詩以後東漢以前則凡有韻之語亦與孫炎沈約以後必限以四聲拘以音切亦不可同日語併識是於記末以質諸同志者

跋鄧某宣和使金賜私覲茶幣

本朝立國規模好生惡殺故於外國盜賊常有招懷之

意然其間以戰致和者其盟易而久宣靖以來反是往往怨我而誨盜利民而誤國覽鄧氏遺事為之慨然

跋蘇文忠屬黃州教授作賀鄧樞密啓

言貴於有物無物非言也後世非放誕相高則虛美相加迨其流弊至為駢四儷六以相諂瀆則不足以謂之言矧曰文乎哉東坡付他人作賀啓亦初無甚異而疑者喋喋不厭何也

題李肩吾為尹商卿書鄉黨

天之生民有是物必有是則故凡威儀容貌飲食衣服  
何莫非天則之流行也聖人德盛仁熟從容中道門弟  
子精體實踐詳說而備書之則所以學聖人也李肩吾  
為人書鄉黨者數矣得是書者皆使予識其末今商卿  
又以屬余嗚呼商卿尚敬之哉昊天曰明及爾出王昊  
天曰旦及爾游衍夫苟瞬存息養而實有得於斯焉則  
知古人之所謂學者蓋如此

跋辛簡穆公與秦檜爭和議奏稿



和親之說未有不怠我而長寇者耿秦諸公以來率襲  
是誤而不為脩攘之慮始於患失終以亂邦予固憤此  
久矣紹定四年蒙恩西歸舟至夔門會勁寇外侵臺榭  
內潰幸君俱出示先簡穆奏豪因識其後

鶴山集卷六十三

欽定四庫全書

鶴山集卷六十四

宋 魏了翁 撰

跋

跋靜春先生劉子澄帖

靜春先生劉公淳熙五年八月十九日所與張宣公帖也宣公時為祕閣修撰荆湖轉運副使過其弟端明公於宜春劉公之兄靖之字子和卒於贛州教官將葬而屬銘焉劉氏世載令德為國朝文章家逮公尤孜孜以

人才爲己任朱文公稱其收恤宗黨接引後來樂人之善矜人之惡盖得之親見宣公雖不及識公而書問往來間氣味之同亦爾此可以強致乎是歲石林李公年二十悅齋李公年十有八而靜春以二公屬宣公已曰異日與川中作師表非小補也而數十年後悉如其言人固不易知然而心者神明之舍所以範圍天地出入古今苟志平氣定不遷於私好惡不奪於小利害往往可以十得八九况稟氣之清明者固亦可以望而知之

某生晚不及與觀一時師友之盛猶幸與輔漢卿趙昌父張元德諸公遊知靜春事為悉因悅齋李公刻此帖見寄附姓名其末嗚呼師友道廢利祿相挺上慢其下下諛其上以講學儲才相規益者鮮矣張德衡其實此帖亦以覘世道之變云

跋牟少真發蒙中庸大學俗解

吾儒之書自諸老先生語錄外未有方言俚字為文者蓋弟子之於師唯恐稍失其指故聰聰之謹書之莫之

敢易也近世乃勦入科舉之文以惑凡近以欺庸有司  
諉曰姑以給取利祿耳是固可陋今年君之為中庸大  
學發蒙將以信今詒後而為是俚俗之語五方之言語  
不相通而可強同乎又若謂世人不可與莊語姑俯而就  
之者然則不淺之待人乎言之不文行而不遠年君歸  
為我精思而文言之亦有當商略者茲未暇及也

跋牛寶章大年記楊少卿事

牛聘君所記辨誣蓋寶慶三年趙敏若為鄭損所誣幾

成大獄楊叔正時為軍器監帥蜀人之在朝者白于有位而有不謂然則自為書爭辯益切前誣卒以盡白嗚呼此豈有為為之哉高閭植槐等事則近乎有為者矣書其末而歸之叔正之子埴其尚勿替先志云

題蘇叔明公誠陶然堂賦後

南麾退翁蘇文公之兄也持正不撓終於利州路提點刑獄子孫多賢且繼踵科級其五葉曰叔平者自號松菊花園有子曰公誠字叔明以禮自牧為族黨歸重嘗

賦陶然堂以自述非明乎義利之際者不及此余歸自  
靖叔明訪余山居言論風指歛浮歸實進進未已嗚呼  
世家搖落不振邦國之恥也叔明尚懋敬之哉玄默執  
徐壯月穀旦

跋東坡趙德麟字說真蹟

趙德麟始以僚屬受知於蘇公今蘇集有倡醕字說與  
秋陽春色二賦世之賢德麟者以此雖然嘉祐元祐之  
蘇公孰不知趨而和之迨蘇公度嶺諸賢皆坐廢錮德



麟與馬而猶惓惓於片文遺墨之是寶於是知德  
麟之所存者遠矣予歸自謫所今安德節度趙公之子  
與洸武叔攜字說真蹟相眎安德以儒科發身器周才  
裕而局不得施而有子是紹茲其為麟不已多乎嗚呼  
武叔其尚勉之哉

題孟莘事狀

昔歲銜命拜昭慈於攢宮器皿裳衣獲窺於奩中今觀  
心畫於孟氏之宗大抵德而度溫而恭吾雖不識公進

意其恂恂守正有昭慈之遺風

跋張宣公帖

張子論著惟論語說乃晚歲更定而朱子四書於中庸尤所盡心今師君遇所藏宣公筆蹟二者咸在是誠可寶矣當乾道淳熙間朱張呂三子以學問為群儒倡雖其才分天成功力純至然亦不可謂非師友切磋之益朱子序張子文集以其間有講焉未定之論為恨序呂子讀詩記亦曰其間所謂朱氏者皆某少時講焉而未定

之說以此知先儒進學朝益而暮習月異而歲殊蓋有  
所謂勉焉維日孳孳斃而後已者彼世之粗涉梗槩而  
哆焉自足者殆亦不知愧懼耳

又

公以淳熙五年守荆七年二月七日易箴今其十四日  
書云詰朝陽至蓋六年長至正在月半則此帖距公  
之亡才八十四日耳其二十日帖云氣體未復不免灼  
艾想公之疾自此日侵嗚呼所謂任重而道遠於此

亦可畧見拊卷太息書其末以歸諸范文叔甫之壻師氏

跋朱文公帖

右朱文公與月舟范公文叔帖凡五皆寧考初元也是時孽韓枋國黨禍方張此何時也而以予所見於蜀士大夫如劉文節公李良仲宗丞季章叅政君亮侍郎與今范公之家所藏朱公報帖則一時善類應與固自若也權臣威燄徒能怖赫庸貪而終不能以間人心之同

刺之三曰刺之無咎失上下也復之四曰中行獨復以從道也夫居羣陰之間而獨能失其同類惟道是從矧茲聲氣之合胡可刼而禦之予雖生晚而身履乎慶元泰禧盛衰之變周旋乎范劉諸李與二熙羣賢之間嗚呼我視謀猶伊于胡底亦足以悲夫

題蘄州儀曹范墳元帥府牒後

靖康之禍薦紳大夫士未嘗不憤惋於大官貴人無足倚賴而冗曹裨官猶可與有為也趙哲一使臣能以百

騎束勁敵向拱一尉掾能以梧繩批遊騎傅亮一文學能以義旅造青城陳淬一小校能先諸將以敗敵於南華韓世忠一制將能引部將以却敵於南京至於據神稷破鵲眼者乃安邑之士人日中碎敵五十壁者乃石濠之小吏首渡河以復新興者乃招撫司之屬將以千八百騎夜刺孛董者乃經略司之都監曰孟迪曰种潛曰張勉曰張漸曰白保曰李進皆剋關超距雷動風從於王庶之檄異時中興諸將繇此其選使當時得將相

大臣有以用之俾各竭所長經營河朔則彼當遠伏涼  
澱之北而祖宗境土遄歸職方矣蘄州儀曹范公其一  
也予歸自靖道雙流公之孫子郟誦公自蘄趨濟顛末  
咸歎世弊俗偷方時晏然位驕祿侈者偃然物上盜弄  
人爵蠱壞士氣胚胎禍機一朝潰裂幸而有懷忠蘊義  
之士起濟濡首之厲然猶扼塞不得亨嗚呼其車旣載  
乃棄爾輔自古禍亂相尋於無窮者類若此曹器遠辨  
紙尾三人乃汪黃耿非宗忠簡此說甚善使忠簡而在

此位也吾所謂某某者必有以用之范公當不至流落秦陝待張忠獻之薦而後受知於思陵也後百餘年臨邛魏某歛涕書於下方

書瀘士周挺讀歷代書

古之學者習乎禮樂射御書數內以養德性之知外以固筋骸之束進乎大學則格物致知以往皆為己之事也是皆失其傳惟有挾冊讀書以求之前言往行而讀之者亦罕讀之而有得焉又罕有也周文叔挺乃能取



歷代帝王以來之書窮搜力索廣記詳說嗚呼其用力亦勞矣文叔求予一言方以王事未暇與之詳講也姑識其末以俟他日

題朱文公帖

王氏之盛也江南學者爭稱門生其黜也諱焉蘇氏之學爭尚於元祐而諱稱於紹聖以後又大顯於阜陵褒崇之日至程子諸儒亦莫不隨時之抑揚而為輕重迨近世則朱張子諸儒一詬一言散落人間者無一不顯

予之精力弊於題識雖然予甚懼焉李君盍為我語諸同志其相與用力於不睹不聞以庶幾無負於諸老先生之訓

題孫教授誌銘

吾同年友孫次龍之葬張義立志之劉文節公銘之可以無憾矣然帖所謂歲寒山之兆乃其考君手卜史巫紛言不可於是廟殯垂三十年厥子應龍彊喜克家乃改卜得負郭田惟允食竭訾以庚之又為豪右所奪刑

獄使者歸其田始克葬卜九月之甲子先事過予言曰  
劉銘張誌得之孔艱而兆異時改乞公一言以識諸碑  
陰嗚呼次龍之才之懿之行之脩而止於是而死於是  
也人孰無死而殞於奇禍人孰不葬而搖於異論夫世  
以作善離殃疑天之夢夢者信乎其陋矣終於不可詰  
則曰將在其子孫抑猶未免責償於天道也雖然應龍  
尚勉之哉

陳猷春龍出穴圖

天基節前一月獲觀於白鶴山是日郎吏以友人陳和仲損奏劄錄本見寄其間有云陛下居飛龍在天之位而悔之以潛龍勿用之德讀之慨然識其說於此

王荊公真翰

按集所載與此小異蓋為江寧守陳和仲作也介甫既為相而庠屋寒䟽不改其素所以見信於當時而得以肆行其志也

跋克齋游吏部所書孟子一章

孟子之告宋句踐亦猶游之告尹也是時三遊之風已  
勝孟子之說殆與貨色之對相似然尹君其知此則知  
景仁所以敬我者深矣若見同遊之士併出以告之某  
書於三瀘州宅

跋趙安慶所藏東坡帖

予昔遷靖與廣西為鄰廣郡牧守多故舊時以方物問  
予如蘇公遺墨及海魚黎洞沈椰子酒吉貝黎莫之等  
率中州所罕見黎莫如青基布暑夕可以覆體雖然飲

食之物則非靖比也靖之米斗百泉羊豕為斤十減米之二蔬笋又不論也予常閱蘇公帖自謂衣食之奉視蘇子卿啖糲食鼠為大靡麗以予居靖言之視文忠公之靡麗又加一等詩曰君子于役苟無飢渴吾儕勉諸上親政之歲魏某書於瀘州官舍

跋趙安慶先世詩

舒守趙侯以其先君子所書黔婁詩六十言見寄又自為九十言識其末凡皆表廉訓儉以示子孫是時改元

端平上手書戒貪吏草茅賤臣某布宣德音退而識於  
百五十言之末嗚呼以義利言則清心約己士之常分  
也姑以利害言則世之黷貨徇利者祇見其害未睹其  
利公孫瓚以鐵為門鐵非不固也董卓以金為塢金非  
不多也徒以敗家亡身為他人守耳

書魏少申墓仲碑陰

少伸予所厚也今其沒十有七年始克葬先事之月伯  
衡以一編書視予而言曰昔歲將葬吾父前禮部侍郎

曹公器遠為誌其寢尋以史巫拘忌誌所書歲月丘封與今不合且始卜日於嘉定十七年五月甲子今卜紹定六年十二月乙酉始卜地於盤石縣高榮山震岡與先母裴氏合葬今卜瀘川縣天柴山巽岡以繼母張氏祔夫子為我書之以輔前誌且母裴之卒慶元二年五月庚子母張之卒紹定二年二月乙酉誌亦未之書也為我併識之嗚呼墓之有碑雖漢魏之末造而人子報親之心必誠必信於此亦可槩見乃為勒其語於碑陰



以備來者之參攷云

通典跋

杜氏通典之書包括古今涵貫精粗人習焉不察例以類書目之予自成都嘗倣其書為國朝通典因得以熟復終帙今起家守瀘帑有刊本而文字漫漶半不可識將盡易之而先是有已經脩者棄之亦可惜乃命工易十之四凡二千葉為文五十七萬有奇端平元年九月甲子臨邛魏某書

鶴山集卷六十四

欽定四庫全書

鶴山集卷六十五

宋 魏了翁 撰

跋

跋丹稜劉氏黨籍

崇寧定元祐為姦黨第元符上書人為邪等以附元祐之末且姦邪之名人所甚惡而子孫矜以為榮作史者又以姦魁邪上為最榮然則謂隨夷溷謂跖蹻廉千數百年間用事之臣蓋一轍也臨邛魏了翁歸自靖州之

明年書以遺劉東巽識諸炎興詔旨之末

題史繩祖孝經

朱文公嘗著孝經刊誤公之子在嘗舉元藁以遺余余  
既鈹梓與學士共之史慶長又以告予曰昔者繩祖嘗  
集先正名賢孝經註解今願得刊誤為之章指余舉以  
畀之俾得彙次成編則又以黃直卿孝經本旨及其所  
輯洙泗論孝合為一書嗚呼此民生日用之常后王降  
德之本而由之不知觀是書者其亦知所發哉

題彭山宋彥祥詩卷

宋彥祥前年過我袖出八詩有擊壤集中氣脉今年又  
求予友肩吾書之索予題識詩造平澹此豈易得第擇  
理容有聖門所未道者如點檢精時管甚人與事事安  
排要侶渠等語更當商略而了翁方治東歸之裝未暇  
也

題吳武安所得高孝兩朝宸翰

粵自宣靖畀政匪人女真小醜敢抗大邦莫有北向發

一矢者迨富平後我師始與彼角殺金平之後我師始挫其鋒則張忠獻倡之吳武安繼之然後彼知中國有人而不敢肆張韓劉岳接跡於江淮然後中國之勢重而和好之議以定竊觀近日三京喪師悼頗牧之不可作撫卷太息拜手稽首識於下方

題周子靖理齋銘後

銘云窮則不  
循循則不窮

義理之說千百載而一日千百人而一心也今東南之學有建有溫有明各是其說不可以強同是說也了翁

與徵之則以建為然建蓋宗乎濂伊濂伊祖六經者也  
端平二年春書於眉山東郊

跋脩全趙公所作蒙箴

吾鄉之俗以親師講學為業以孝弟忠信為本不趨時  
尚不事外飾予生雖後尚及見大父行於經子百氏書  
皆覆紙細字丹鉛點勘又必師傅友授必心體身踐視  
今之後生子弟捐金市書不累月可得千百卷聚友聯  
文不頃刻可成千百言者雖若迂頓不快人意而操心

厚見理實傳家久遺後安流風餘澤至今可識也慮此事久而無傳因楊子有以修全趙公蒙箴見示附志其末

題馮仰之因重論後

普慈馮起文以其父仰之先生因重論見寄請識其末予少讀易見諸儒重卦之說有四王輔嗣以為伏羲鄭康成以為神農孫盛以為夏禹史遷以為周文孫鄭之義亡據而馬王之說人多是之然予以為唐虞之時固



有卜筮則四營十八變尚矣固不待文王而後重爻也  
不寧惟是竊意先天一圖自古有之嘗舉似謝起文則  
曰何傷乎亦各述其所見以待後之學者於是識一時  
問答為因重論序

跋師厚卿致仕十詩

師厚卿自紹定元年貢於鄉以母疾禱於上下神祇曰  
萬有一齒一名於進士籍則貤祿吾母俾壽且寧不願  
仕也其秋不復試禮部厥三年而後舉進士則母不及

見矣既唱第廷中謀挂衣冠而奪於親暱之異論不遂  
初志卒受爵以歸歸而得疾幾殆則憮然嘆曰豈我食  
吾言以干天怒乎決意不仕賦十詩見志屬李肩吾書  
之予識之予謂之曰子以蒼蒼者為天耶此心之神明  
則天也此心之所不安則天理之所不可天豈屑屑然  
與人商較是非也詩曰敬天之怒無敢戲豫子也急求  
緩棄違心所安是戲豫也語曰吾誰欺欺天乎子謂人  
心之外又有所謂天乎厚卿竦然曰我事吾志不他有

侮矣乃識其事於詩末以成厚卿之志

跋御書鶴山書院四大字

臣伏見廬山高岳衡麓睢陽各有書院自太平興國訖  
大中祥符錫之號榮被以詔墨至近世東湖北巖濂谿  
象山之稱皆嘗有請於朝風聲所形聞者興起臣生於  
印之鄙自開禧邊議不合去之古白鶴山之下築室聚  
友將終身焉兩朝聖明照知臣心訖荷眷憐致位通顯  
茲又蒙陛下申錫寶翰賁耀林廬臣竊惟先朝賜書必

以名湏實顧臣熏心患難舊讀荒蕪大懼無以稱塞隆指其自今乞身得請將歸老鶴山之麓顧瞻奎文帝臨有赫誓畢餘齒力求初心以無忘君師訓迪之意

跋御書唐人嚴武詩二十八言

臣嘗妄謂易書詩春秋凡仲尼所述不言將蓋出師於郊遂而王朝之公卿董之四代以來未之有改迨二禮三傳後出始有軍將將軍之名於是師久於外徃徃不從中遣非所以共武服謹師命也臣識闇能薄獨荷陞

下殊典之遇自親大政召冠禁聯會鞅鞅披猖受我亂  
民整居王略肆命臣以宥府視師賜對禁中假權閭外  
贏金篚幣賞賚優渥既又親御筆札大書唐人嚴武詩  
二十八言以寵靈之英雲明露膏耀管茅師乘傳觀人  
百其勇師之坤曰在師中吉承天寵也王三錫命懷萬  
邦也此陛下為萬邦計臣獨何人遽當王朝公卿之選  
赫赫王命以鎮拊其干音掇側柳反出襄公二十五年註言行夜也下拜  
登受曷云其疇臣謹以宸翰被諸金石班其事於侯封

用答揚明天子親命幹方之意為臣工勸

題楊慈湖所書韓貫道墓後

安陽韓燮相從於督府一日以其先人貫道墓銘相示  
則燮之婦之祖楊敬仲所書也予不及與貫道接而敬  
仲所稱許若此且跡其所受知者則劉共父韓無咎劉  
子澄林和叔徐子宜王元石也嗚呼是可以知貫道矣  
忠獻之後多賢者特以開禧權臣例遭挫偃或曰權臣  
實非韓氏遺體也

予既書此或曰先賢可字乎曰若用孔門弟子與子思孟子稱仲尼例則字先賢已過矣曰然則可乎曰魏晉以來文書不足證吾以六經二漢為據

跋先表叔留題鍾山西湖二詩後

珠簾白舫亂湖光  
隔岸龍舟艤夕陽  
今日懽遊復明日  
便將京洛看錢塘

右題臨安西湖

虛名自昔數椽廬  
流毒於今幾卷書  
擬代周

顯報山鬼移文逋客請先渠

右題王文公祠臨邛高孝璫公純父開禧  
二年十一月十一日

了翁以嘉泰三年造朝開禧二年補郡去同產兄高稼  
皆得侍先表叔父大夫公東游聽言觀行朝夕有所省  
發了翁雖甚愚不肖而不肯曲學阿世以取忤權貴人  
則大夫教忠之力也大夫游杭之西湖金陵之鍾山皆  
嘗隨事賦詠定予幸得遺藁二首刻諸樂石了翁謹以



從遊所見書其末亦以見前輩不苟於為文也

跋陳君舉東宮進故事

右漢元帝事實一通故起居郎止齊陳先生傳良為先  
皇帝嘉邸贊讀時所書也朱字三十有六則寧考即所  
聞而記之今藏之蔡文懿之季子範簿以了翁在經筵  
日嘗為主上論元成事發明班史二贊粗有益於謹獨  
之學因請識其後了翁雖不敢以固陋辭然而改變氣  
質最忌因循與夫歸其責於傳而實以咎帝此則有益

於人主之講學非宿儒老生不及此敢用拜手書於下方

跋四十年前補試卷

慶元初仰之先生攝令於吾邑蒲江予以舉文受知今四十年過先生之鄉宰木成陰先生之子企文亦頌白矣袖出一卷書乃當時縣庠試論猶記是時日試二論此其次也前卷在第三名嗚呼是所謂大慚則大好者與人心之說雖未必皆本指然不為無補於是教企文

故存之

題陳思書苑菁華

古以書為名如周官達書名於四方儀禮百官書於末  
則今所謂字也是故欲知學者不先識字則無以名百  
物雖顛張草聖阿買八分猶為不識字也臨安粥書人  
陳思乃能集漢晉以後論書者為一編曰書苑菁華亦  
可尚矣雖然是猶後世誇工鬪妍非吾所謂識字者若  
好學者又於此溯流尋源以及於秦漢而上求古人所

以正名之意則讀書為文也其庶幾乎

題呂城李氏世藏名帖

寶慶元年冬魏某得罪時宰投畀蠻荆道呂城獲觀李  
唐裔孫祐所寶唐賢遺墨是日劉平國王去非踏雪見  
訪皆竒遇也惟是虞褚顏宋間乃有李林甫姓名此易  
繇所謂勿用取女之時重有感慨云

題茅山道士所藏朱晦菴以佛語調楊誠齋周

益公帖

朱子訖為佛氏語以寄周楊二老其戲言以効他人體  
邪抑逃墨以解學禁之禍邪其以修辭立誠之義於晚  
生終有未達不可強為之說也

題深衣畫像

言忠信行篤敬言若易聖猶病申六言以自儆行顧言  
言顧行

題盧祖岳復別祖墓


予嘗為同年友盧申之序盧氏會拜錄今其兄仲山以

其別祖倉監之墓久失而復得復使識其事盧於唐為  
甲族今六百餘年而子孫之賢者代不乏人況如吾仲  
山遊學膠庠鑿鹽不贍而能為別祖復三百年之墓是  
滋可尚也

書劉仲坎習之孝義傳後

詩曰既明且哲以保其身若習之之身首異處不保身  
乎然則此義不明人於毫髮利害趨之避之惟恐後則  
世之包羞含垢辱全軀保妻子皆保身也劉起居作孝

義傳謂習之兄弟至死不相捨孝也罵賊而死義也此  
豈不善保身者哉後六年史臣魏了翁與其兄厚之從  
遊獲觀劉起居所識因附姓名其末



鶴山集卷六十五